

DIE TWEEDE BRIEF AAN DIE KORINTHIËRS

Inleiding

Nadat Paulus *1 Korinthiërs*, waarskynlik vroeg in 55 nC, geskryf het, verneem hy van 'n krisis in die Korinthise gemeente. Ná 'n dringende besoek aan die gemeente wat vir hom uiters pynlik verloop het (2 Kor 2:1), skryf hy “deur baie trane heen” 'n streng brief en oorhandig dit aan Titus om in die gemeente te gaan aflewer (2:3-4; 7:8-13). Hy ontmoet Titus later in Macedonië. Laasgenoemde bring die goeie nuus dat die Korinthiërs se gesindheid teenoor Paulus verander het (7:5-16). Verlig en vol vreugde skryf Paulus *Die Tweede Brief aan die Korinthiërs* vanuit Macedonië, waarskynlik in die najaar van 55 nC.

In die aanhef (1:1) vermeld Paulus Timoteus as medeskrywer, maar te oordeel aan die persoonlike trant van die brief, is hyself duidelik die eintlike outeur.

Die ontstaan en samestelling van hierdie gemeente, asook die probleme wat later daar ontstaan het, word in die inleiding tot *1 Korinthiërs* bespreek. In *2 Korinthiërs* hanteer Paulus nuwe probleme wat intussen na vore gekom het. Dit blyk dat Paulus openlik in Korinthe geopponeer is, sonder dat die res van die gemeente vir hom in die bresse getree het (2:1-11; 7:5-13). Boonop verdra die gemeente die optrede van vals apostels wat Paulus se bediening ondermyn (10-12).

Naas *Galasiërs* en *Filemon* is *2 Korinthiërs* die mees persoonlike van Paulus se gemeentelike briewe. Die bevraagtekening van sy bediening stem hom

diep bedroef. Die grootste deel van *2 Korinthiërs* handel oor die herstel van sy verhouding met hierdie gemeente, wat immers uit sy pioniersarbeid ontstaan het. Sy reaksie op die situasie in die gemeente word weerspieël deur sy gelaaide taalgebruik. Terselfdertyd bevat *2 Korinthiërs* besondere stilistiese hoogtepunte, wat veral deur die gebruik van ironie in hoofstukke 10 — 13 na vore kom. Sommige navorsers vermoed selfs dat hierdie hoofstukke die sogenaamde “tranebrief” bevat, waarna die apostel in 2:3-4 en 7:8-13 verwys.

2 Korinthiërs gee aan ons 'n besondere insig in Paulus se verstaan van die evangeliebediening. Hy verkondig nie homself nie (3:5-6), maar Jesus Christus as Here (4:5), selfs te midde van persoonlike opoffering en lyding (4:7-18; 6:4-10; 11:23-33). Die bediening van die nuwe verbond is 'n kosbare heerlikheid (3:11), al word dit in kleipotte geberg (4:7). Nêrens elders in die Bybel word die aard van versoening so in diepte geskets as in *2 Korinthiërs* nie (5:11-21). Die gemeente moet hulle Christelike vrygewigheid sigbaar maak deur die kollekte vir die gelowiges in Jerusalem (8 — 9), en hulle word ernstig opgeroep om te waak teen die vals apostels (10 — 12).

Die boek kan soos volg ingedeel word:

1:1-2 Brieffaanhef

1:3-7 Lofprysing oor God se bystand in beproewing

1:8 — 7:16 Aspekte van die apostel se verhouding tot die gemeente

8:1 — 9:15 Insameling vir die behoeftige gelowiges in Judea

10 — 12 Paulus verdedig sy gesag as apostel teenoor dié van die vals apostels

13:1-12 Slotopmerkings, opdragte en groete

13:13 Seëngroet

1

¹ Paulus, 'n •apostel van •Christus Jesus deur die wil van God,^{*} en die broer Timoteus,

aan^a die •gemeente van God wat in Korinthe is, saam met al die heiliges^b in die hele Agaje:^c

² *Genade en vrede vir julle van God, ons Vader, en die Here Jesus Christus.

God se bystand in beproewing

³ Lofwaardig is die God en Vader van ons Here Jesus Christus,^{*} die Vader van barmhartigheid en God van alle bemoediging.^{*} ⁴ Hy bemoedig ons in al ons verdrukings, sodat ons hulle wat in allerhande verdrukings verkeer, kan bemoedig met die bemoediging waarmee ons self deur God bemoedig word; ⁵ *want net soos Christus se lyding oorvloedig oor ons kom, so is ook ons bemoediging oorvloedig deur Christus. ⁶ *As ons dan verdruk word, is dit ter wille van julle bemoediging en redding; as ons bemoedig word, is dit ter wille van julle

***1:1** *Paulus ... wil van God:* 1 Kor 1:1

^a**1:1** *aan:* In die formele briefstyl soos deur die skrywer gebruik, ontbreek die werkwoord wat in die gedagte aangevul moet word, naamlik “skryf” aan.

^b**1:1** *heiliges:* Mense wat vir die diens van God afgesonder en aan Hom gewy is. Wanneer gelowiges “heiliges” genoem word, verwys dit nie na hulle morele opvattinge of voortreflike eienskappe nie, maar na die werklikheid dat hulle aan God, as die Heilige, behoort.

^c**1:1** *Agaje:* 'n Romeinse provinsie wat uit Sentraal- en Suid-Griekeland bestaan het.

***1:2** Rom 1:7; 1 Kor 1:3

***1:3** *Lofwaardig ... Christus:* Ef 1:3; 1 Pet 1:3

***1:3** *God van ... bemoediging:* Rom 15:5

***1:5** Ps 34:19; 94:19

***1:6** 2 Kor 4:15,17

bemoediging, wat tot uitdrukking kom deurdat julle met volharding dieselfde lyding verduur as wat ons deurmaak. ⁷ Ons hoop vir julle is seker, omdat ons weet dat, soos julle deel het aan die lyding, julle ook so deel het aan die bemoediging.

⁸ Want, broers,^d ons wil nie hê julle moet onkundig wees oor die verdrukking wat ons in Asië^e beleef het nie,* dat die swaarkry wat ons verduur het, ver bo ons kragte was, sodat ons selfs aan ons lewe gewanhoop het. ⁹ Trouens, wat onself betref, het ons al as't ware die doodsvonnis oor ons ontvang; maar dit was sodat ons nie op onself sou vertrou nie, maar op God, wat die dooies opwek. ¹⁰ Op Hom wat ons uit so 'n groot doodsgevaar gered het en sal red, is ons hoop gevestig dat Hy ons weer sal uitred.* ¹¹ Hiertoe dra julle ook by deur julle gebede vir ons, sodat deur bemiddeling van baie mense namens ons dank betuig kan word vir die genadegawe aan ons.

Spanning oor Paulus se besoek

¹² Ons roem is juis dit: die getuienis van ons gewete* dat ons in die wêreld, en veral teenoor julle, opgetree het in opregtheid^f en met eerlikheid wat van God kom* — ook nie deur menslike wysheid nie,* maar deur die genade van God. ¹³ Ons skryf immers aan julle niks anders as wat julle lees en ook

^d**1:8 broers:** Volgens destydse opvatting was die susters hierby ingesluit.

^e**1:8 Asië:** 'n Romeinse provinsie. Die westelike deel van Klein-Asië, die huidige Wes-Turkye, saam met verskeie eilande en kusstede van die Egeïese See, met Efese as hoofstad.

***1:8 die verdrukking ... het nie:** Hand 19:23; 1 Kor 15:32

***1:10 sal red ... sal uitred:** 2 Tim 4:18

***1:12 die getuienis ... gewete:** Heb 13:18

^f**1:12 in opregtheid:** Volgens sommige Griekse mss “in heiligheid”.

***1:12 in opregtheid ... God kom:** 2 Kor 2:17

***1:12 nie deur ... wysheid nie:** 1 Kor 1:17

verstaan nie. En ek hoop dat julle later ten volle sal verstaan ¹⁴ — soos julle ons ook ten dele verstaan het — dat ons op die dag van ons Here Jesus* julle tot roem sal wees,* net soos julle ook vir ons.

¹⁵ In hierdie vertrouwe wou ek vroeër na julle kom, sodat julle 'n tweede guns kon ontvang. ¹⁶ *Ek wou by julle langs deurreis na Macedonië,⁸ om weer van Macedonië af na julle terug te kom, en deur julle na Judea toe voortgehelp te word. ¹⁷ Ek het tog nie ligtelik gehandel toe ek my dit voorgeneem het nie? Of beplan ek wat ek beplan uit menslike swakheid,* sodat wat my betref “ja, ja” tegelyk “nee, nee” kan wees? ¹⁸ Maar God is getrou — ons woorde aan julle is nie tegelyk “ja” en “nee” nie; ¹⁹ want Jesus •Christus, die •Seun van God, wat deur ons aan julle verkondig is, deur my en Silvanus en Timoteus,* was nie “ja” én “nee” nie — intendeel, in Hom het dit “ja” geword. ²⁰ Want hoeveel beloftes van God daar ook mag wees, in Hom is hulle “ja”; daarom sê ons deur Hom “•amen” aan God, tot sy eer.* ²¹ *Dit is God wat ons saam met julle in Christus 'n vaste fondament gegee het, en ons gesalf het; ²² wat ons ook verseël* en die Gees as waarborg^h in ons harte gegee het.*

* **1:14** op ... *Jesus*: Fil 2:16

* **1:14** dat ons ... *sal wees*: 2 Kor 5:12

* **1:16** Hand 19:21; 1 Kor 16:5-6

⁸**1:16** *Macedonië*: 'n Romeinse provinsie in die Balkanskiereiland, noord van •Agaje, met Thessalonika as hoofstad.

* **1:17** *beplan ek ... swakheid*: 2 Kor 5:16

* **1:19** *deur my ... Timoteus*: Hand 18:5

* **1:20** *sê ... eer*: Op 3:14

* **1:21** 1 Joh 2:27

* **1:22** *wat ... verseël*: Ef 1:13; 4:30

^h**1:22** *waarborg*: Kan ook vertaal word “deposito” of “eerste paalement”.

* **1:22** *die Gees ... gegee het*: Rom 8:16; 2 Kor 5:5; Ef 1:14

²³ Wat my betref, ek roep God as getuie oor my* dat ek juis om julle te spaar, nog nie weer na Korinthe gekom het nie. ²⁴ Nie dat ons oor julle geloof wil baasspeel nie* — intendeel, ons is medewerkers aan julle vreugde. Julle staan immers vas in die geloof.

2

¹ Dit het ek my dus voorgeneem: om nie weer met droefheid na julle te kom nie.* ² Immers, as ék julle bedroef maak, wie anders kan my bly maak as die een wat ek bedroef gemaak het? ³ En dit is presies wat ek geskryf het, sodat ek nie, wanneer ek kom, bedroef word deur hulle wat my moes bly maak nie. Ek vertrou op julle almal, dat my vreugde julle almal s'n sal wees. ⁴ Want met groot kwelling en ang in my hart het ek deur baie tranes heen aan julle geskryf,* nie om julle te bedroef nie, maar dat julle kan weet van die liefde wat ek in so 'n groot mate teenoor julle koester.

Liefde en vergifnis vir die oortreder

⁵ *Maar as iemand droefheid veroorsaak het, is dit nie vir my wat hy bedroef het nie, maar sonder om te oordryf, in 'n mate julle almal. ⁶ *Vir so iemand is hierdie teregwyding deur die meerderheid genoeg. ⁷ Gevolglik moet julle hom in plaas daarvan eerder vergewe en bemoedig, sodat iemand soos hy nie dalk deur oormatige droefheid verteer word nie.ⁱ ⁸ Daarom vermaan ek julle ernstig om julle liefde aan hom te herbevestig. ⁹ Want vir dié doel het ek ook geskryf: om julle

*1:23 *Wat ... oor my*: Rom 1:9; 2 Kor 11:31; Fil 1:8; 1 Thess 2:5,10

*1:24 *Nie ... baasspeel nie*: 1 Pet 5:3

*2:1 *om ... kom nie*: 1 Kor 4:21; 2 Kor 12:21

*2:4 *Want ... geskryf*: Hand 20:31

*2:5 1 Kor 5:1

*2:6 2 Kor 7:11-12

ⁱ2:7 *deur ... word nie*: Die idioom kan vertaal word “deur droefheid ingesluk word”.

betroubaarheid te leer ken, of julle in elke opsig gehoorsaam is.* ¹⁰ En vir hom wat julle iets vergeef, vergeef ek ook. Wat ek inderdaad vergeef het — as ek iets vergeef het — was ter wille van julle voor die aangesig van •Christus, ¹¹ sodat Satan^j nie die oorhand oor ons kry nie.* Ons is immers nie onbekend met sy planne nie.

Paulus se besorgdheid

¹² Toe ek in Troas aangekom het om die evangelie van Christus te verkondig, en die Here reeds 'n deur vir my oopgemaak het,* ¹³ kon ek nogtans geen gemoedsrus kry nie, omdat ek my broer Titus nie daar aangetref het nie. Daarom het ek toe van hulle afskeid geneem en na Macedonië^k vertrek.*

Triomftog van die evangelie

¹⁴ Maar dank aan God, wat ons altyd deur •Christus in sy triomftog meevoer, en die geur van sy kennis op elke plek deur ons versprei. ¹⁵ Want ons is 'n aangename geur^l van Christus aan God vir dié wat verlos word én vir dié wat verlore gaan* — ¹⁶ vir laasgenoemde 'n reuk vanuit die dood tot die dood, vir eersgenoemde 'n geur vanuit die lewe tot die lewe.* En

***2:9** of ... *gehoorsaam is*: 2 Kor 7:15; 10:6

^j**2:11** *Satan*: Die benaming “Satan” is afgelei van 'n Hebreeuse woord wat ‘teenstander’ of ‘aanklaer’ beteken.

***2:11** *sodat ... kry nie*: Luk 22:31

***2:12** *die Here ... oopgemaak het*: Hand 14:27; 1 Kor 16:9; Kol 4:3; Op 3:8

^k**2:13** *Macedonië*: 'n Romeinse provinsie in die Balkanskiereiland, noord van •Agaje, met Thessalonika as hoofstad.

***2:13** *het ek ... vertrek*: Hand 20:1

^l**2:15** *geur*: Dit sinspeel op die gebruik van die Romeine om tydens 'n triomftog wierook te brand.

***2:15** *dié wat verlos ... gaan*: 1 Kor 1:18

***2:16** *vir laasgenoemde ... tot die lewe*: Luk 2:34

wie is hiertoe bekwaam?* ¹⁷ Ons is nie soos so baie ander wat smous met die woord van God nie; maar ons praat in opregtheid, asof vanuit God, voor God, en dit in Christus.*

3

Bedienaars van die nuwe verbond

¹ Begin ons weer om onself aan te beveel?* Of het ons miskien, soos sommige, aanbevelingsbriewe aan julle of van julle* nodig? ²* Julle is ons brief, geskryf in ons harte, gelees en verstaan deur alle mense. ³ Julle is duidelik 'n brief van •Christus wat deur ons diens opgestel is, geskryf, nie met ink nie, maar met die Gees van die lewende God; nie op kliptafels* nie, maar op die tafels van menseharte.*

⁴ So 'n vertrouwe op God het ons deur Christus. ⁵* Nie dat ons uit onself bekwaam is om te reken dat iets uit onself kom nie — nee, ons bekwaamheid kom van God. ⁶ Hy het ons bekwaam gemaak om bedienaars van 'n nuwe verbond* te wees — nie van die letter nie, maar van die Gees. Want die letter maak dood, maar die Gees maak lewend.*

⁷ As die bediening van die dood, wat met letters op klippe gegraveer is,

*2:16 wie ... bekwaam: 2 Kor 3:5-6

*2:17 ons praat ... Christus: 2 Kor 1:12; 1 Pet 4:11

*3:1 Begin ... beveel: 2 Kor 5:12

*3:1 aanbevelingsbriewe ... van julle: Hand 18:27; Rom 16:1

*3:2 1 Kor 9:2

*3:3 kliptafels: Eks 24:12; 31:18; 34:1; Deut 9:10,11

*3:3 die tafels van menseharte: Spr 3:3; 7:3; Jer 31:33; Eseg 11:19; 36:26

*3:5 2 Kor 2:16

*3:6 nuwe verbond: Eks 24:8; Jer 31:31-34; 32:40; 1 Kor 11:25; Heb 8:8-13

*3:6 Want ... lewend: Joh 6:63; Rom 7:6

met soveel heerlijkheid tot stand gekom het dat die volk Israel nie stip na die aangesig van Moses kon kyk nie weens die glans op sy gesig, wat tog aan die verbygaan was* — ⁸ hoeveel te meer sal die bediening van die Gees nie in heerlijkheid wees nie? ⁹ Want as daar heerlijkheid was in die bediening wat lei tot veroordeling,* soveel oorvloediger in heerlijkheid is die bediening wat lei tot regverdiging.^{m*} ¹⁰ Trouens, wat verheerlik was,* is eintlik in hierdie opsig geen verheerliking nie, weens dié allesoortreffende heerlijkheid. ¹¹ Want as dit wat vergaan, met heerlijkheid bekleed was, het die blywende veel groter heerlijkheid.

¹² Terwyl ons dan so 'n hoop het, tree ons op met groot vrymoedigheid — ¹³ nie soos Moses, wat 'n sluier oor sy gesig getrek het* sodat die Israeliete nie die einde van dit wat aan die vergaan was, kon aanskou nie. ¹⁴ Maar hulle denke was verhard.* Want tot vandag toe lê dieselfde sluier oor die Ou Testamentⁿ wanneer dit gelees word, en dit word nie weggeneem nie, want dit word slegs in Christus verwyder. ¹⁵ Maar tot vandag toe, elke keer wanneer Moses gelees word, lê daar 'n sluier oor hulle harte. ¹⁶ *Telkens egter, wanneer iemand hom tot die Here wend, word die sluier afgehaal. ¹⁷ Die Here is die Gees,* en waar die Gees van die Here is, daar is vryheid.* ¹⁸ En ons almal, terwyl ons met ontsluitende

***3:7** die volk ... verbygaan was: Eks 34:28-35

***3:9** die bediening wat lei tot veroordeling: Deut 27:26

^m**3:9** regverdiging: Kan ook vertaal word “vryspraak”.

***3:9** die bediening wat lei tot regverdiging: Rom 1:17; 3:21

***3:10** wat ... was: Eks 34:29-30

***3:13** Moses ... getrek het: Eks 34:33,35

***3:14** hulle ... verhard: Rom 11:25

ⁿ**3:14** *Ou Testament*: Kan ook vertaal word “Ou Verbond”.

***3:16** Eks 34:34; Rom 11:23,26

***3:17** die Gees: 2 Kor 3:3,6

***3:17** waar die ... vryheid: Joh 7:39; 8:32,36; Rom 8:2,14-17; Gal 4:21-31; 5:1,13

gesig die heerlijkheid van die Here* aanskou soos in 'n spieël,^o word na dieselfde beeld verander, van heerlijkheid tot heerlijkheid, soos afkomstig van die Here, die Gees.

4

Paulus se bediening — 'n skat in kleipotte

¹ Daarom, aangesien ons hierdie bediening het* volgens die ontferming wat aan ons betoon is, gee ons nie moed op nie. ² Ons het egter afstand gedoen van geheime skandelige dinge, en tree nie slinks op of verdraai die Woord van God nie;* maar deur die waarheid aan die lig te bring, beveel ons onself voor die aangesig van God aan by die gewete van elke mens. ³* As ons evangelie dan tog nog versluier is, is dit versluier vir dié wat verlore gaan, ⁴ vir die ongelowiges wie se denke deur die god van hierdie bedeling* verblind is, sodat die lig van die evangelie van die heerlijkheid van •Christus, wat die beeld van God is,* nie oor hulle skyn^p nie. ⁵* Ons verkondig immers nie onself nie, maar Jesus Christus as Here, en onself as julle diensknegte ter wille van Jesus. ⁶ Want God wat gesê het, “Laat daar uit die duisternis lig skyn,”* dit is Hy wat in ons harte geskyn het om ons te verlig met die kennis van die heerlijkheid van God, in die aangesig van Jesus Christus.*

* **3:18** heerlijkheid ... Here: Eks 16:7; 24:17

^o**3:18** aanskou ... spieël: Kan ook vertaal word “om te weerspieël”.

* **4:1** aangesien ... het: 2 Kor 3:6

* **4:2** tree ... God nie: 2 Kor 2:17; 1 Thess 2:5

* **4:3** 1 Kor 1:18

* **4:4** die god ... bedeling: Ef 2:2

* **4:4** wat ... God is: Kol 1:15; Heb 1:3

^p**4:4** skyn: Kan ook vertaal word “aanskou”.

* **4:5** 2 Kor 1:24

* **4:6** Laat ... lig skyn: Gen 1:3; Jes 9:1

* **4:6** dit ... Christus: 2 Kor 3:18

⁷ Hierdie skat het ons in kleipotte,* sodat die buitengewone krag duidelik van God kom en nie van ons nie.

⁸ In alles word ons verdruk,* maar nie oorweldig nie;
ons is oor raad verleë, maar nie radeloos nie;

⁹ ons word vervolg, maar nie in die steek gelaat nie;
ons word platgeslaan, maar nie vernietig nie.

¹⁰ Die sterwe van Jesus dra ons altyd in ons liggaam met ons saam,
sodat ook die lewe van Jesus in ons liggaam sigbaar kan word.

¹¹ Want ons wat leef, word voortdurend aan die dood uitgelewer ter wille van Jesus,* sodat ook die lewe van Jesus in ons sterflike liggaam sigbaar kan word. ¹² So werk die dood dan in óns, maar die lewe in julle. ¹³ Maar aangesien ons dieselfde Gees^q van die geloof het — soos geskryf staan, “Ek het geglo, daarom het ek gepraat”^r — glo ons ook en daarom praat ons. ¹⁴ *Ons weet dat Hy wat die Here Jesus opgewek het, ons ook saam met Jesus sal opwek en julle voor Hom sal stel. ¹⁵ Want dit gebeur alles ter wille van julle,* sodat die genade, wat steeds meer mense insluit, die dankbaarheid oorvloedig kan maak tot eer van God.

* **4:7** Hierdie ... kleipotte: 2 Kor 5:1

* **4:8** In ... verdruk: 2 Kor 1:8; 7:5

* **4:11** Want ... wille van Jesus: Rom 8:36; 1 Kor 15:31

^q**4:13 Gees:** Kan verwys na die Gees van God of na die gees of ingesteldheid wat die psalmdigter die volgende woorde laat sê het.

^r**4:13 Ek het ... gepraat:** Ps 116:10. Paulus se aanhaling stem presies ooreen met Ps 115:1 (die betrokke gedeelte) in die •Septuagint, die vertaling wat hy normaalweg gebruik.

* **4:14** Rom 8:11; 1 Kor 6:14; 15:15,20

* **4:15** Want ... julle: 2 Kor 1:3-6

Die tydelike teenoor die ewige

¹⁶ Daarom gee ons nie moed op nie, want selfs al vergaan ons uiterlike mens, word ons innerlike mens van dag tot dag vernuwe.* ¹⁷ *Want ons ligte en tydelike verdrukking bewerk vir ons 'n gewigtige en allesoortreffende ewige heerlikheid, ¹⁸ terwyl ons nie let op die sigbare nie, maar op die onsigbare dinge;* want die sigbare is tydelik, die onsigbare ewig.

5

¹ Ons weet tog dat wanneer ons aardse tentwoning* afgebreek word, ons 'n gebou het wat van God kom, 'n ewige woning in die hemele,^s wat nie met hande gemaak is nie. ² *En daarom sug ons, want ons verlang intens daarna om met ons woning vanuit die hemel bekleed te word. ³ As ons net nie ontkleed en nakend gevind sal word nie! ⁴ Want ons wat nog in die tentwoning is, sug as mense wat swaarkry, omdat ons nie ontkleed nie, maar gekleed wil word; sodat wat sterflik is, verteer kan word deur die lewe.* ⁵ Hy wat ons juis hiervoor voorberei het, is God, wat aan ons die Gees as waarborg^t gegee het.*

* **4:16** word ... vernuwe: Ef 3:16

* **4:17** Rom 8:17-18

* **4:18** terwyl ... dinge: Kol 1:16; Heb 11:1,3

* **5:1** ons aardse tentwoning: Job 4:19; 2 Kor 4:7

^s**5:1 hemele:** Volgens die destydse wêreldbeeld was daar verskillende hemele, waaronder die wolkehemel, die sterreheemle en die derde hemel waar God woon.

* **5:2** Rom 8:23

* **5:4** gekleed ... lewe: 1 Kor 15:53-54

^t**5:5 waarborg:** Kan ook vertaal word “deposito” of “eerste paaiement”.

* **5:5** God wat ... gegee het: Rom 8:16,23; 2 Kor 1:22; Ef 1:13

⁶ Daarom is ons altyd vol moed, al weet ons dat, terwyl ons nog in die aardse liggaam woon, ons nie by die Here woon nie;^{*} ⁷ *want ons leef deur geloof, nie deur aanskoue nie. ⁸ Ons bly egter vol moed, al verkies ons om eerder uit die liggaam te verhuis en by die Here te woon.*

⁹ *Daarom, of ons reeds inwoon of nog nie inwoon nie, streef ons daarna om vir Hom welgevallig te wees. ¹⁰ *Want ons moet almal voor die regterstoel van •Christus verskyn, sodat elkeen kan ontvang volgens wat hy in sy liggaamlike bestaan gedoen het, of dit goed of kwaad was.

Bediening van versoening

¹¹ Aangesien ons weet wat ontsag vir die Here is, probeer ons mense oortuig. Maar by God is ons deeglik bekend, en ek hoop om ook in julle gewete so bekend te wees.* ¹² Ons is nie weer besig om onself by julle aan te beveel nie,* maar ons gee julle aanleiding tot roem oor ons,* sodat julle iets kan hê teen dié wat hulle op die uiterlike voorkoms beroem en nie op wat in die hart is nie. ¹³ As ons buite onself is, is dit vir God; as ons by ons verstand is, is dit vir julle. ¹⁴ Die liefde van •Christus dryf ons, omdat ons tot dié insig gekom het dat indien Een vir almal gesterf het, almal dan gesterf het; ¹⁵ en Hy het ter wille van almal gesterf,* sodat dié wat leef, nie meer vir hulleself sal leef nie, maar vir Hom wat ter wille van hulle gesterf het en opgewek is.*

* 5:6 *terwyl ... woon nie:* Heb 11:13-16

* 5:7 1 Kor 13:12

* 5:8 *verkies ... woon:* Fil 1:23

* 5:9 Kol 1:10; 1 Thess 4:1

* 5:10 Pred 12:14; Hand 17:31; Rom 2:16; 14:10

* 5:11 *ek ... wees:* 2 Kor 4:2

* 5:12 *Ons ... beveel nie:* 2 Kor 3:1

* 5:12 *ons gee ... oor ons:* 2 Kor 1:14

* 5:15 *Hy ... almal gesterf:* 1 Tim 2:6

* 5:15 *dié ... opgewek is:* Rom 14:7-8

¹⁶ Gevolglik ken ons van nou af niemand meer na sy uiterlike nie. Selfs al het ons Christus eens na die uiterlike leer ken, ken ons Hom nou nie meer so nie. ¹⁷ Daarom, as iemand in Christus is, is hy 'n nuwe skepping.* Die ou dinge het verbygegaan — kyk, hulle het nuut geword.* ¹⁸ En dit alles kom van God af, wat ons deur Christus met Homself versoen het* en aan ons die bediening van die versoening gegee het. ¹⁹ Dit bestaan daarin dat God in Christus die wêreld met Homself versoen het* deur hulle nie hulle oortredinge toe te reken nie; en Hy het aan ons die boodskap van versoening toevertrou. ²⁰ Ons tree dan op as gesante ter wille van Christus,* asof God self deur ons 'n beroep op julle doen. Ons pleit by julle, om Christus ontwil: Laat julle met God versoen! ²¹ Hy wat nie sonde geken het nie,* Hom het God ter wille van ons sonde gemaak,* sodat ons in Hom voor God geregverdig^u kon word.*

6

¹ As medewerkers van God doen ons 'n ernstige beroep op julle om nie die genade van God tevergeefs te ontvang nie!* ² Want Hy sê:

“Op die regte tyd het Ek na jou geluister en op die dag van redding het Ek jou gehelp.”*

*5:17 as ... *skepping*: Rom 8:1,10; Gal 6:15

*5:17 Die ou ... *geword*: Jes 43:18; Op 21:5

*5:18 God ... *versoen het*: Rom 5:10

*5:19 God ... *versoen het*: Rom 3:24-25; Kol 1:19-20

*5:20 Ons ... *van Christus*: Jes 52:7; Ef 6:20

*5:21 Hy ... *het nie*: Joh 8:46; Heb 4:15; 1 Pet 2:22

*5:21 Hom het ... *gemaak*: Gal 3:13

^u5:21 *geregverdig*: Kan ook vertaal word “vrygespreek”.

*5:21 ons in ... *word*: 1 Kor 1:30; Fil 3:9

*6:1 doen ... *ontvang nie*: 2 Kor 5:20

*6:2 Op ... *gehelp*: Jes 49:8 •Septuagint

Kyk, nou is die gunstige tyd, nou is die dag van redding!* ³ Ons gee in geen opsig enige aanstoot aan iemand nie, sodat daar nie met die bediening foutgevind kan word nie. ⁴ Maar in alles beveel ons onself aan* as dienaars van God, met groot uithou vermoë:

in verdrukings, in ontberings, in benoudhede;

⁵* geslaan, in tronke gegooi, in oproere en in swaar arbeid, in slaaploosheid en honger;

⁶* met eerbaarheid, begrip, verdraagsaamheid en vriendelikheid, in die Heilige Gees en met opregte liefde;

⁷ met die woord van die waarheid, met die krag van God,* met die wapens van •geregtigheid vir die regterhand en die linkerhand;^v ⁸ te midde van eer en oneer, te midde van laster en lof, as misleiers wat tog opreg is;

⁹ as onbekendes en tog goed bekend, as sterwendes — maar kyk, ons leef;* as gekastydes wat tog nie doodgemaak word nie,*

¹⁰ as bedroefdes, maar altyd blymoedig,* as armes, maar wat baie ander mense ryk maak, as mense wat niks het nie en tog alles besit.

* **6:2** *nou is die gunstige ... redding:* Luk 4:19-21

* **6:4** *beveel ... aan:* 2 Kor 4:2

* **6:5** 2 Kor 11:23-27

* **6:6** 1 Tim 4:12

* **6:7** *met die woord ... God:* 1 Kor 2:4

^v**6:7** *regter- ... linkerhand:* Die wapen in die regterhand is gebruik vir aanval en in die linkerhand vir verdediging.

* **6:9** *sterwendes ... leef:* 2 Kor 4:10

* **6:9** *gekastydes ... word nie:* Ps 118:18

* **6:10** *bedroefdes ... blymoedig:* 2 Kor 7:4; Fil 2:17; Kol 1:24; 1 Thess 1:6

¹¹ Ons het reguit met julle gepraat,^w Korinthiërs; ons harte is wyd oop vir julle. ¹² Julle word nie deur ons ingeperk nie, maar julle word deur julleself in julle eie binneste ingeperk. ¹³ Maar doen dit as teenprestasie — ek praat soos met kinders:^{*} Stel julleself ook wyd oop vir ons.

Tempel van die lewende God

¹⁴ Moenie in dieselfde juk trek saam met ongelowiges nie,^{*}

want watter vennootskap kan daar wees tussen reg en onreg?

Of watter verbondenheid kan daar wees tussen lig en duisternis?

¹⁵ En watter ooreenstemming is daar tussen •Christus en Belial,^x of wat het 'n gelowige met 'n ongelowige gemeen?

¹⁶ En watter ooreenkoms het die tempel van God met afgode?

Want ons is die tempel van die lewende God^{*} — soos God gesê het:

“Ek sal onder hulle woon en saam met hulle wandel;

Ek sal hulle God wees,

en hulle sal my volk wees.”^{*}

¹⁷ Daarom:

^w**6:11** *Ons ... gepraat*: Die Griekse idioom kan vertaal word “Ons het ons mond teenoor julle oopgemaak”.

^{*}**6:13** *ek ... kinders*: 1 Kor 4:14

^{*}**6:14** *Moenie ... ongelowiges nie*: Ef 5:7,11

^x**6:15** *Belial*: Of Beliar, 'n naam wat •Satan of die Antichris as waardeloos of uitgedien tipeer.

^{*}**6:16** *Want ... lewende God*: 1 Kor 3:16; 6:19

^{*}**6:16** *Ek sal onder ... volk wees*: Lev 26:11-12; Jer 32:38; Eseg 37:27

“Gaan uit hulle midde uit
en sonder julle af,” sê die Here,
“en moenie aanraak wat •onrein is nie.”*

“En Ek sal julle aanneem,”*

¹⁸ en

“Ek sal vir julle 'n Vader wees
en julle sal my seuns en dogters wees,”*

sê die Here, die Almagtige.*

7

¹ Aangesien ons hierdie beloftes het, geliefdes, laat ons ons reinig van alle besoedeling van liggaam en gees, terwyl ons met diep ontsag vir God ons heiligheid verwesenlik.

Blydskap oor die Korinthiërs se berou

² Maak vir ons ruimte. Ons het niemand veronreg nie; ons het niemand skade berokken nie; ons het niemand uitgebuit nie.* ³ Ek sê dit nie om julle te veroordeel nie — ek het vantevore al gesê dat julle in ons harte is* om saam te sterf en saam te leef. ⁴ Ek het groot vrymoedigheid teenoor julle en is baie trots op julle. Ek is nou vol moed en loop oor van blydskap te midde van al ons verdrukking.

* **6:17** *Gaan ... is nie:* Jes 52:11; Op 18:4

* **6:17** *En Ek ... aanneem:* Eseg 20:34,41

* **6:18** *Ek sal ... dogters wees:* 2 Sam 7:8,14; Jes 43:6; Jer 31:9

* **6:18** *die Here, die Almagtige:* Am 3:13; 4:13 •Septuagint; Op 4:8; 11:17; 15:3; 21:22

* **7:2** *ons het niemand uitgebuit nie:* 2 Kor 12:17

* **7:3** *in ons harte is:* 2 Kor 6:11-13; Fil 1:7

⁵ Want selfs nadat ons in Macedonië^y gekom het,* het ons liggaamlik geen rus gehad nie en het ons van alle kante verdrukking ervaar — van buite aanslae en van binne angs. ⁶ Maar God, wat die neerslagtiges bemoedig, het ons bemoedig* deur die koms van Titus — ⁷ en nie net deur sy koms nie, maar ook deur die bemoediging waarmee hy oor julle bemoedig is. Hy het ons kom vertel van julle verlange, van julle berou,^z van julle ywer vir my, sodat ek my nou nog meer verheug. ⁸ *Want al het ek julle met die brief bedroef gemaak, is ek nie spyt nie. En al was ek ook spyt — want ek sien dat daardie brief julle bedroef gemaak het, al was dit ook net vir 'n rukkie — ⁹ is ek nou bly; nie omdat julle bedroef gemaak is nie, maar omdat julle droefheid tot berou gelei het. Julle is volgens die wil van God bedroef gemaak, met die gevolg dat julle in geen opsig deur ons benadeel is nie. ¹⁰ Want die droefheid, volgens die wil van God, bewerk inkeer wat tot verlossing lei, en waaroor niemand ooit spyt is nie; maar wêreldse droefheid lei tot die dood.* ¹¹ Want kyk nou net watter toewyding julle droefheid volgens die wil van God vir julle bewerk het: ja, watter verontskuldiging, watter verontwaardiging, watter ontsag, watter verlange, watter ywer, watter bestraffing! In elke opsig het julle getoon dat julle onskuldig is wat hierdie saak betref. ¹² Al het ek aan julle geskryf, was dit nie ter wille van die een wat onreg gepleeg het nie, en ook nie ter wille van die veronregte nie, maar ter wille daarvan dat julle toewyding vir ons duidelik aan julle bekend kan

^y**7:5 Macedonië:** 'n Romeinse provinsie in die Balkanskiereiland, noord van •Agaje, met Thessalonika as hoofstad.

***7:5 nadat ... gekom het:** Hand 20:1-2; 2 Kor 2:13

***7:6 God ... ons bemoedig:** Jes 49:13; 2 Kor 1:3-4

^z**7:7 berou:** Letterlik 'roubeklag'.

***7:8** 2 Kor 2:4

***7:10 maar ... dood:** Sir 38:18; Matt 27:3-5; Heb 12:17

word voor God. ¹³ Daarom is ons bemoedig.

En benewens ons bemoediging het ons ons nog meer verbly oor Titus se blydskap, omdat hy gemoedsrus by julle almal gevind het. ¹⁴ As ek enigsins oor julle by hom gespog het, staan ek nie beskaamd nie; maar soos alles wat ons julle vertel het, waar is, so het ons gespog by Titus ook waar geword. ¹⁵ En sy toegeneentheid teenoor julle word al sterker, namate hy hom herinner aan julle almal se gehoorsaamheid* en hoe julle hom met vrees en bewing ontvang het. ¹⁶ Ek is verheug dat ek in alle opsigte op julle kan staatmaak.

8

Insameling vir die armes in Jerusalem en Judea

¹ * Ons laat julle ook weet, broers, van die genade van God wat aan die •gemeentes in Macedonië^a gegee is: ² dat hulle, te midde van swaar beproewing as gevolg van verdrukking, hulle oorfloedige vreugde en hulle diep armoede laat oorfloei het in 'n rykdom aan vrygewigheid van hulle kant af. ³ Ek getuig dat hulle na vermoë, ja, selfs bo vermoë, bereidwillig was. ⁴ Hulle het pleitend by ons aangedring om deel te kan hê aan die genadewerk van hulpverlening aan die heiliges.^{b*} ⁵ Dit was nie slegs soos ons gehoop het nie; trouens, hulle het hulleself eers aan die Here gegee en toe, deur die wil van God, ook aan ons. ⁶ Gevolglik het ons

*7:15 *julle almal se gehoorsaamheid*: 2 Kor 2:9

*8:1-4 Rom 15:26

^a8:1 **Macedonië**: 'n Romeinse provinsie in die Balkanskiereiland, noord van •Agaje, met Thessalonika as hoofstad.

^b8:4 **heiliges**: Mense wat vir die diens van God afgesonder en aan Hom gewy is. Wanneer gelowiges “heiliges” genoem word, verwys dit nie na hulle morele opvattinge of voortreflike eienskappe nie, maar na die werklikheid dat hulle aan God, as die Heilige, behoort. Verwys hier na die gelowiges in Jerusalem en omgewing.

*8:4 *van hulpverlening ... heiliges*: Hand 11:29; 2 Kor 9:1

Titus sterk aangemoedig om, soos wat hy hierdie genadewerk reeds begin het, dit ook net so by julle te voltooi. ⁷ Soos julle nou van alles oorvloed het, geloof en welsprekendheid en kennis* en alle ywer en die liefde, wat deur ons toedoen onder julle is, sorg dat julle ook in hierdie genadewerk oorvloedig is.*

⁸ Ek sê dit nie as 'n opdrag nie, maar om aan die hand van ander se ywer die egtheid van julle liefde te toets. ⁹ Want julle ken die genade van ons Here Jesus •Christus; dat Hy wat ryk was, ter wille van julle arm geword het,* sodat julle deur sy armoede ryk kan word. ¹⁰ En ek gee my mening hieroor, want dit strek tot julle voordeel — julle wat reeds 'n jaar gelede begin het om dit nie net te doen nie, maar dit ook te wil doen. ¹¹ Voltooi dan nou ook die taak, sodat, net soos julle bereidwillig was om dit te wil doen, julle ook bereidwillig sal wees om dit te voltooi uit wat julle het. ¹² *Want as daar bereidwilligheid is, is dit aanneemlik volgens wat 'n mens het — nie volgens wat jy nie het nie. ¹³ Dit beteken nie dat ander verligting kry en julle swaarkry nie, maar wel dat daar ewewig sal wees. ¹⁴ Julle huidige oorvloed vul hulle tekort aan,* sodat hulle oorvloed weer julle tekort kan aanvul en daar so ewewig kan wees. ¹⁵ Soos daar geskryf staan:

“Die een met baie het nie te veel gehad nie,
en die een met net 'n bietjie, nie te min nie.”*

Titus en sy medewerkers

¹⁶ En aan God die dank, wat dieselfde ywer in julle belang in die hart van

* **8:7** *nou ... kennis:* 1 Kor 1:5

* **8:7** *in hierdie ... oorvloedig is* 1 Kor 16:1-2

* **8:9** *Want ... geword het:* Matt 8:20; Fil 2:6-7

* **8:12** Spr 3:27-28; Mark 12:43

* **8:14** *Julle huidige ... tekort aan:* 2 Kor 9:12

* **8:15** *Die een ... min nie:* Eks 16:18

Titus gegee het. ¹⁷ Want hy het wel ons versoek ontvang, maar het ook baie ywerig en vrywillig na julle toe vertrek. ¹⁸ En saam met hom het ons die broer gestuur wie se lof in al die •gemeentes besing word oor sy werk vir die evangelie. ¹⁹ En nie net dit nie: hy is ook deur die gemeentes aangewys as ons reisgenoot in hierdie genadewerk, wat deur ons verrig word tot verheerliking van die Here en as bewys van ons bereidwilligheid. ²⁰ So wil ons voorkom dat iemand ons verdink oor hierdie ruim som wat ons behartig. ²¹ *Want ons is bedag op wat reg is, nie net voor die Here nie, maar ook voor mense. ²² Saam met hulle stuur ons ons broer, wat ons dikwels en in vele opsigte getoets en ywerig bevind het, en wat nou nog yweriger is deur sy groot vertrouwe in julle. ²³ Wat Titus betref, hy is my deelgenoot en medewerker in julle belang. Wat ons broers betref, hulle is gesante van die gemeentes, 'n eer vir •Christus. ²⁴ Lewer dan aan hulle voor die gemeentes* die bewys van julle liefde en van ons trots op julle.*

9

Insameling met dankbaarheid en blydskap

¹ Eintlik is dit vir my onnodig om aan julle oor die dienslewering aan die •heiliges* te skryf. ² Want ek ken julle bereidwilligheid, waarmee ek oor julle by die Macedoniërs^c spog — dat Agaje^d al sedert 'n jaar gelede gereed is, en dat julle ywer die meeste van hulle aangespoor het. ³ Maar ek het die broers gestuur sodat ons gespog oor julle in hierdie saak nie verydel sal word nie en julle gereed sal wees, soos ek gesê het julle sal wees — ⁴ en ook

*8:21 Spr 3:4 •Septuagint

*8:24 die gemeentes: 2 Kor 8:19

*8:24 ons ... op julle: 2 Kor 7:14

*9:1 die dienslewering ... heiliges: 2 Kor 8:4,20

^c9:2 **Macedoniërs:** Inwoners van 'n Romeinse provinsie in die Balkanskiereiland, noord van •Agaje, met Thessalonika as hoofstad.

^d9:2 **Agaje:** 'n Romeinse provinsie wat uit Sentraal- en Suid-Griekeland bestaan het.

sodat, indien daar dalk Macedoniërs saam met my sou kom en julle in hierdie saak onvoorbereid sou aantref, ons ons nie sal hoef te skaam nie, om nie eers van julle te praat nie. ⁵ Daarom het ek dit noodsaaklik geag om die broers aan te spoor om vooruit na julle te gaan en die dankoffer wat julle vroeër beloof het, in orde te kry, sodat dit gereed sal wees as 'n werklike dankoffer, en nie as iets wat afgedwing is nie.

⁶ *Die punt is: Wie karig saai, sal karig oes; en wie oorvloedig saai, sal oorvloedig oes. ⁷ Laat elkeen gee soos hy vooraf in sy hart besluit het — nie met droefheid of onder dwang nie, want God het 'n blymoedige gewer lief.* ⁸ En God is magtig om alle genade oorvloedig vir julle te laat wees, sodat julle altyd in elke opsig selfversorgend kan wees en oorvloedig kan bydra tot elke goeie werk. ⁹ Soos daar geskryf staan:

“Hy het wyd uitgestrooi; Hy het aan die armes gegee; sy •geregtigheid bly vir ewig.”*

¹⁰ En Hy wat saad aan die saaiers voorsien en ook brood as voedsel,* sal aan julle saad verskaf en dit vermeerder, en Hy sal die vrug van julle geregtigheid* laat toeneem. ¹¹ So word julle in elke opsig verryk om in alles vrygewig te wees, en dit loop deur ons bemiddeling uit op danksegging aan God.* ¹² Want die hulp van hierdie bediening voorsien nie net in die •heiliges se behoeftes nie,* maar lei ook tot 'n oorvloed van baie uitinge van danksegging aan God. ¹³ Op grond van die bewys wat

*9:6 Spr 11:24; 22:9

*9:7 God ... lief: Spr 22:8 •Septuagint

*9:9 Hy het wyd ... ewig: Ps 112:9

*9:10 En Hy ... voedsel: Jes 55:10

*9:10 die vrug ... geregtigheid: Hos 10:12 •Septuagint

*9:11 dit ... God: 2 Kor 1:11; 4:15

*9:12 die hulp ... behoeftes nie: 2 Kor 8:14

deur hierdie diensbetoning gelewer word, verheerlik hulle God oor julle gehoorsaamheid aan julle belydenis van die evangelie van •Christus, en oor die vrygewigheid van julle bydrae aan hulle en aan almal.

¹⁴ Terselfdertyd verlang hulle, in hulle gebede vir julle, vuriglik na julle weens die oortreffende genade wat God aan julle bewys het. ¹⁵ Aan God die dank vir sy onbeskryflike gawe.

10

Paulus verdedig sy gesag as apostel

¹ Ek self, Paulus — wat glo bedees is wanneer ek by julle teenwoordig is,* maar ewe manhaftig teenoor julle wanneer ek afwesig is — doen 'n ernstige beroep op julle, met die sagmoedigheid en vriendelikheid van •Christus.

² Ek pleit dat, wanneer ek by julle is, ek nie manhaftig hoef te wees met die selfvertroue waarmee ek reken om diegene aan te durf* wat van mening is dat ons in menslike swakheid handel nie. ³ Want al tree ons in menslike swakheid op, voer ons die stryd nie in menslike swakheid nie. ⁴ Die wapens van ons stryd is immers nie menslik nie,* maar, danksy God, kragtig om sterk vestings af te breek, redenasies te vernietig, ⁵ en ook elke skans wat opgerig word teen die kennis van God. Ook neem ons elke gedagte gevange tot gehoorsaamheid aan Christus, ⁶ en staan gereed om elke ongehoorsaamheid te straf tot wanneer julle volledig gehoorsaam sal wees.*

⁷ Kyk na wat ooglopend is:^e As iemand oortuig is dat hy aan Christus behoort, moet hy dit weer by homself in berekening bring dat, net soos hý

*10:1 wat ... teenwoordig is: 1 Kor 2:3

*10:2 Ek pleit ... durf: 1 Kor 4:21

*10:4 Die wapens ... menslik nie: Ef 6:13-17

*10:6 julle ... wees: 2 Kor 2:9

^e10:7 Kyk ... is: Kan ook as 'n stelling vertolk word “Julle kyk na wat ooglopend is.”

aan Christus behoort, so ook ons. ⁸ Want selfs al sou ek my 'n bietjie buitensporig beroem* op die gesag wat die Here aan ons gegee het om julle op te bou en nie om af te breek nie,* sal ek nie daaroor skaam wees nie.

⁹ My doel is nie om die indruk te skep dat ek julle met my briewe wil bangpraat nie. ¹⁰ Want, sê hulle: “Sy briewe is gewigtig en streng, maar sy persoonlike teenwoordigheid is swak en sy woorde niks werd nie.” ¹¹ So iemand moet hiermee rekening hou dat ons woorde in ons briewe, wanneer ons afwesig is, ooreenstem met ons daede wanneer ons teenwoordig is.*

¹² Ons waag dit nie om onself gelyk te stel aan of te vergelyk met sommige van dié wat hulleself aanbeveel nie.* Maar omdat hulle hulle aan hulleself meet en met hulleself vergelyk, verstaan hulle niks. ¹³ Maar wat ons betref, ons sal nie buite ons perke gaan wanneer ons ons op iets beroem nie, maar binne die perke van die werksgebied wat God vir ons as perk gestel het,* om julle ook te bereik. ¹⁴ Ons oorskry immers nie ons perke asof ons nog nie by julle uitgekom het nie; want ons was die heel eerste met die evangelie van Christus by julle. ¹⁵ Ons oorskry ook nie ons perke deur ons op ander mense se arbeid te beroem nie.* Ons koester egter die hoop dat, namate julle geloof toeneem, ons arbeid volgens ons werksgebied by julle grootliks mag uitbrei, ¹⁶ sodat ons die evangelie ook in die landstreke anderkant julle kan verkondig,* sonder om ons te beroem op die resultate wat in iemand anders se werksgebied bereik is.

*10:8 *ek my ... beroem*: 2 Kor 12:6

*10:8 *die gesag ... breek nie*: 2 Kor 13:10

*10:11 *ons woorde ... teenwoordig is*: 2 Kor 13:2,10

*10:12 *Ons ... aanbeveel nie*: 2 Kor 3:1; 5:12

*10:13 *Maar wat ... gestel het*: Rom 12:3

*10:15 *Ons oorskry ... beroem nie*: Rom 15:20

*10:16 *sodat ... verkondig*: Hand 19:21

¹⁷ *Wie hom op iets wil beroem, moet hom beroem op die Here. ¹⁸ *Want dit is nie die een wat homself aanbeveel wat die toets deurstaan het nie, maar die een wat deur die Here aanbeveel word.

11

Paulus en die vals apostels

¹ As julle maar 'n klein bietjie dwaasheid van my sou kon verdra! Verdra my tog maar! ² Want ek is jaloers oor julle met 'n goddelike jaloesie, aangesien ek julle aan een Man, aan •Christus, verbind het,^f om julle as 'n rein maagd aan Hom aan te bied.* ³ Maar ek is bang dat, soos die slang vir Eva met sy geslepenheid mislei het,* julle gedagtes dalk bederf kan raak, verwyderd van die opregte en reine toewyding aan Christus. ⁴ Want as iemand 'n ander Jesus kom verkondig wat ons nie verkondig het nie, of julle ontvang 'n ander gees wat julle nie ontvang het nie, of 'n ander evangelie wat julle nie aanvaar het nie,* verdra julle dit geredelik. ⁵ *Ek reken inderdaad dat ek in geen opsig terugstaan by die sogenaamde super-apostels nie. ⁶ Ek mag onbedrewe wees as spreker,* maar nie onbedrewe in kennis nie* — dit het ons julle in elke opsig en op allerlei maniere laat sien.

⁷ Of het ek 'n sonde begaan deur myself te verneder sodat julle verhoog

* **10:17** Jer 9:24; 1 Kor 1:31

* **10:18** 1 Kor 4:4-5

^f**11:2** *verbind het*: In die Bybelse tyd was 'n verlowing so bindend dat 'n verbreking daarvan as 'n egskeiding behandel is.

* **11:2** *aangesien ... bied*: Ef 5:26-27

* **11:3** *die slang ... mislei het*: Gen 3:13

* **11:4** *Want ... aanvaar het nie*: Gal 1:8-9

* **11:5** 1 Kor 15:10; 2 Kor 12:11; Gal 2:6,9

* **11:6** *Ek ... spreker*: 1 Kor 1:17; 2:1,13

* **11:6** *nie ... kennis nie*: Ef 3:4

kon word, omdat ek die evangelie van God sonder betaling aan julle verkondig het? * ⁸ *Ander •gemeentes het ek beroof deur vergoeding te aanvaar om julle te bedien. ⁹ En terwyl ek by julle was en 'n tekort gehad het, het ek ook niemand geldelik belas nie, * want die broers wat van Macedonië^s af gekom het, het voldoende in my behoeftes voorsien. Ek het my daarvan weerhou en sal my daarvan weerhou om in enige opsig vir julle 'n las te wees. ¹⁰ Die waarheid van Christus is in my: Hierdie roem van my sal nie verswyg word* in die gebiede van Agaje^h nie. ¹¹ Waarom? Omdat ek julle nie liefhet nie? God weet, ek het!

¹² Maar wat ek doen, en sal voortgaan om te doen, is om diegene te verhinder wat 'n geleentheid soek om in die saak waaroor hulle spog as ons gelykes beskou te word. ¹³ Want sulke mense is vals apostels, slinkse werkers,* terwyl hulle hulleself vermom as •apostels van Christus. ¹⁴ En geen wonder nie; want selfs Satanⁱ vermom hom as 'n engel van die lig. ¹⁵ Daarom is dit ook nie vreemd as sy dienaars hulle ook vermom as dienaars van •geregtigheid nie. Hulle einde sal volgens hulle werke wees.

Paulus se lyding vir die evangelie

¹⁶ *Ek sê weer: Laat niemand my as 'n dwaas beskou nie. Of anders: Aanvaar my dan nou maar as 'n dwaas, dat ek ook 'n bietjie oor iets kan

* **11:7** omdat ... verkondig het: 1 Kor 9:12,18

* **11:8** Fil 4:15

* **11:9** het ek ... belas nie: 2 Kor 12:13

^s**11:9 Macedonië:** 'n Romeinse provinsie in die Balkanskiereiland, noord van •Agaje, met Thessalonika as hoofstad.

* **11:10** Hierdie ... word: 1 Kor 9:15

^h**11:10 Agaje:** 'n Romeinse provinsie wat uit Sentraal- en Suid-Griekeland bestaan het.

* **11:13** slinkse werkers: Fil 3:2

ⁱ**11:14 Satan:** Die benaming “Satan” is afgelei van 'n Hebreeuse woord wat ‘teenstander’ of ‘aanklaer’ beteken.

* **11:16** 2 Kor 12:6

spog. ¹⁷ Wat ek nou gaan sê, sê ek nie soos die Here dit sou doen nie, maar soos 'n dwaas, in vertrouwe op my eie gespog. ¹⁸ Aangesien daar baie is wat volgens menslike standarde oor iets spog, sal ek dan ook maar oor iets spog. ¹⁹ Want julle verdra mos graag dwase mense, al is julle so verstandig! ²⁰ Want julle verdra dit as iemand van julle slawe maak, as iemand julle uitsuig, as iemand julle misbruik, as iemand hooghartig optree en julle in die gesig slaan. ²¹ Ek sê dit tot my skande dat ons te swak geword het daarvoor. Maar waarom iemand ook al waag om te spog — ek praat soos 'n dwaas — ek waag dit ook:

²² *Is hulle Hebreërs?^j Ek ook.

Is hulle Israëliete? Ek ook.

Is hulle nakomelinge van Abraham? Ek ook.

²³ Is hulle dienaars van •Christus?

— nou praat ek sonder verstand — ek nog meer:*

oorvloediger in harde werk,

meer dikwels in die tronk,

uitermate geslaan

en dikwels in doodsgevaar.

²⁴ Van die Jode het ek vyf keer veertig houe minus een* gekry;

²⁵ drie maal is ek met stokke geslaan;*

een maal is ek gestenig;*

drie maal het ek skipbreuk gely;

*11:22 Fil 3:5

^j11:22 *Hebreërs*: Arameessprekende Jode.

*11:23 *Is ... nog meer*: 1 Kor 15:10

*11:24 *veertig ... een*: Deut 25:3

*11:25 *is ek met ... geslaan*: Hand 16:22

*11:25 *een ... gestenig*: Hand 14:19

'n nag en 'n dag^k lank het ek die diepsee trotseer;

²⁶ dikwels op reis,

met gevare van riviere,

gehare van rowers,

gehare van die kant van my eie volk,*

gehare van die kant van die heidene,*

gehare in die stad,

gehare in die woestyn,¹

gehare op see,

gehare onder vals broers,

²⁷ * met harde werk en swaarkry,

dikwels met slapelose nagte,

honger en dors,

dikwels sonder kos,

koud en nakend.

²⁸ En afgesien van nog ander ongenoemde dinge, is daar daaglikse druk op my — my kommer oor al die •gemeentes.

²⁹ Wie is swak, en ek is nie ook swak nie?*

^k**11:25 'n nag ... dag:** 'n Vaste uitdrukking, aangesien 'n nuwe dag vir die Israeliete en later ook vir die Jode teen sonder begin het en gestrek het tot net voor sonder die volgende dag. Daarom praat die •brontekste nie van “dag en nag” soos in Afrikaans nie, maar word die nag gewoonlik voor die dag genoem.

* **11:26** *gehare van die kant van my eie volk:* Hand 9:23

* **11:26** *gehare van die kant van die heidene:* Hand 14:5

¹**11:26** *woestyn:* 'n Verlate, deels onherbergsame gebied, met 'n skaarste aan plantegroei, waar kleinvee kon wei.

* **11:27** 2 Kor 6:5

* **11:29** *Wie is ... swak nie:* 1 Kor 9:22

Wie kom tot struikeling, en ek brand nie van ontsteltenis nie?

³⁰ *As daar dan gespog moet word, sal ek oor my swakhede spog.

³¹ *God, die Vader van die Here Jesus, wat lofwaardig is tot in ewigheid, weet dat ek nie lieg nie. ³² *In Damaskus het koning Aretas se etnarg^m die stad Damaskus bewaak om my te arresteer. ³³ Deur 'n venster in die stadsmuur is ek toe in 'n mandjie laat sak en het ek aan sy hande ontkom.

12

Paulus se gesigte en openbarings

¹ As daar dan geroem moet word, is dit nie voordelig nie, maar ek kom nou by gesigte en openbarings van die Here. ² Ek weet van 'n man in •Christus wat veertien jaar gelede tot in die derde hemelⁿ weggeruk is — of dit in die liggaam of buite die liggaam is, weet ek nie, God weet dit. ³ Ek weet ook van so 'n man — of dit met die liggaam of sonder die liggaam was, weet ek nie, God weet dit — ⁴ dat hy weggeruk is tot in die paradys, en onuitspreekbare woorde gehoor het wat 'n mens nie mag noem nie. ⁵ *Op so iemand sal ek my beroem, maar op myself sal ek my nie beroem nie, behalwe oor my swakhede. ⁶ As ek my wel daarop wil beroem, sal ek nie dwaas wees nie,* want ek sal die waarheid praat. Maar

* **11:30** 2 Kor 12:5

* **11:31** 2 Kor 1:23

* **11:32-33** Hand 9:24-25

^m**11:32** *etnarg*: Die ampstitel van iemand wat namens 'n koning of die Romeinse owerheid oor 'n bepaalde gebied of bevolkingsgroep moes regeer.

ⁿ**12:2** *derde hemel*: Volgens die destydse wêreldbeeld was daar verskillende hemele, waaronder die wolkehemel, die sterrehemel en die derde hemel waar God woon.

* **12:5** 2 Kor 11:30

* **12:6** As ... *wees nie*: 2 Kor 10:8; 11:16

ek weerhou my daarvan, sodat niemand meer aan my sal toedig as wat hy van my sien of by my hoor nie, ⁷ selfs met inagneming van die buitengewone aard van my openbarings. Daarom, om te keer dat ek opgeblase word, en sodat ek nie hoogmoedig mag word nie, is daar vir my 'n doring in die vlees gegee, 'n engel van Satan,^o om my met die vuur te slaan.* ⁸ Hieroor het ek die Here drie maal gesmeek dat dit van my moet wyk. ⁹ Maar Hy het vir my gesê: “My genade is vir jou genoeg, want my krag word in swakhede volbring.” Daarom sal ek my baie liever op my swakhede beroem, sodat Christus se krag my kan beskut.^{p 10} *Ter wille van Christus verheug ek my in swakhede, beledigings, ontberings, vervolgings en benoudhede; want wanneer ek swak is, juis dan is ek sterk.

¹¹ Ek het soos 'n dwaas opgetree! Julle het my daartoe gedwing, want ek moes eintlik deur julle aanbeveel gewees het, omdat ek geensins agtergestaan het by die sogenaamde super-apostels nie,* al is ek ook niks. ¹² *Dit wat 'n •apostel kenmerk, is inderdaad by julle verrig met alle volharding, met tekens en wonders en kragtige dade. ¹³ In watter opsig is julle dan swakker behandel as die ander •gemeentes, behalwe dat ek nie vir julle 'n geldelike las was nie?* Vergewe my tog hierdie onreg!

^o**12:7 Satan:** Die benaming “Satan” is afgelei van 'n Hebreeuse woord wat ‘teenstander’ of ‘aanklaer’ beteken.

***12:7 'n engel ... slaan:** Job 2:6

^p**12:9 beskut:** Die Griekse woord roep die beeld op van 'n tent wat as beskutting of beskerming oor iemand opgeslaan word.

***12:10** Fil 4:11,13

***12:11 omdat ... super-apostels nie:** 2 Kor 11:5

***12:12** Rom 15:19

***12:13 ek ... was nie:** 2 Kor 11:9

Besorgdheid oor die gemeente in Korinthe

¹⁴ Kyk, dit is nou die derde keer dat ek gereed is om na julle te kom.* En ek sal nie 'n geldelike oorlas wees nie, want ek soek nie julle besittings nie, maar vir julle. Dit is nie die kinders wat moet spaar vir die ouers nie, maar die ouers vir die kinders. ¹⁵ Wat my betref, sal ek met graagte betaal en myself as betaling gee ter wille van julle siele.^{q*} As ek julle oorvloediger liefhet, waarom ontvang ek dan minder liefde? ¹⁶ Nou goed, ek het julle dus nie belas nie. Maar aangesien ek 'n slinkse mens is, het ek julle glo met lis gevang! ¹⁷ Het ek julle miskien uitgebuit deur enigeen van dié wat ek na julle gestuur het? ¹⁸ Ek het Titus aangespoor en die broer saam met hom gestuur* — het Titus julle miskien uitgebuit? Het ons nie in dieselfde gees, in dieselfde voetspore gewandel nie?

¹⁹ Julle dink reeds lankal dat ons onself teenoor julle verdedig. Deur •Christus praat ons in die teenwoordigheid van God; en dit alles, geliefdes, is om julle op te bou. ²⁰ Ek is bevrees dat as ek kom, ek julle miskien nie sal vind soos ek graag wil nie,* en ek deur julle bevind sal word soos julle graag wil nie; dat daar miskien onenigheid, jaloesie, woede-uitbarstings, selfsug, kwaadpraterij, geskinder, verwaandheid en wanordelikheid sal wees; ²¹ dat wanneer ek weer kom, my God my voor julle sal verneder en ek sal treur oor baie van dié wat vroeër gesondig het* en hulle nie bekeer het van die onreinheid en onsedelikheid en losbandigheid wat hulle bedryf het nie.

*12:14 *dit is nou ... kom:* 2 Kor 13:1

^q12:15 *siele:* Mense se bewuste, innerlike self wat kan voortbestaan ná hulle liggaamlike dood.

*12:15 *Wat ... siele:* Fil 2:17

*12:18 *Ek ... gestuur:* 2 Kor 8:6,16-18

*12:20 *Ek is ... ek graag wil nie:* 2 Kor 2:1-4

*12:21 *van dié ... gesondig het:* 2 Kor 13:2

13

Slotopmerkings, opdragte en groete

¹ Dit is die derde keer dat ek na julle toe kom.* “In die mond van twee of drie getuies sal elke woord bevestig word.”* ² Vir dié wat voorheen gesondig het, en ook vir al die ander, het ek dit tevore, toe ek die tweede keer daar was, gesê; en nou in my afwesigheid sê ek dit vooruit, dat wanneer ek kom, ek hulle nie weer sal ontsien nie. ³ Julle soek immers 'n bewys dat dit Christus is wat deur my praat. Hy is nie swak teenoor julle nie, maar is kragtig onder julle.

⁴ Hy is weliswaar deur swakheid gekruisig,*
maar Hy leef deur die krag van God.

So is ook ons swak in Hom, maar teenoor julle sal ons saam met Hom leef uit die krag van God.

⁵ Ondersoek julleself of julle in die geloof is; toets julleself.* Ken julle julleself dan nie? Besef julle dan nie dat Jesus Christus in julle is nie? Tensy julle die toets gefaal het. ⁶ Maar ek hoop dat julle sal insien dat ons nie die toets gefaal het nie. ⁷ Ons bid wel tot God dat julle geen kwaad sal doen nie — nie om te wys dat óns die toets deurstaan het nie, maar sodat julle die goeie sal doen, selfs al sou dit lyk asof ons die toets gefaal het. ⁸* Ons is nie in staat om enigiets téén die waarheid te doen nie, maar wel vir die waarheid.* ⁹ Ons is bly wanneer ons swak is en julle sterk — en

*13:1 *Dit ... kom:* 2 Kor 12:14

*13:1 *In ... word:* Deut 19:15; vgl Matt 18:16; 1 Tim 5:19

*13:4 *Hy is ... gekruisig:* Fil 2:7-8

*13:5 *Ondersoek ... toets julleself:* 1 Kor 11:28

*13:8 1 Kor 13:6

*13:8 *waarheid:* 2 Kor 11:10

hiervoor bid ons, naamlik vir julle vervolmaking. ¹⁰ *Daarom skryf ek hierdie dinge in my afwesigheid, sodat wanneer ek by julle aanwesig is, ek nie streng hoef op te tree volgens die gesag wat die Here my gegee het nie — om op te bou en nie om af te breek nie.

¹¹ Ten slotte, broers, wees altyd bly, * streef na vervolmaking, aanvaar vermaning, wees eensgesind, leef in vrede — en die God van liefde en vrede sal met julle wees. * ¹² *Groet mekaar met 'n heilige soen. Al die •heiliges stuur vir julle groete.

Seëngroet

¹³ Die genade van die Here Jesus •Christus en die liefde van God en die gemeenskap van die Heilige Gees bly met julle almal.

* **13:10** 2 Kor 2:3; 10:8,11

* **13:11** *Ten slotte ... bly:* Fil 4:4

* **13:11** *die God ... julle wees:* Rom 15:33

* **13:12** Rom 16:16; 1 Kor 16:20; 1 Pet 5:14